

Si interpretacion di datonan ta positivo

Na luna di november Repsol lo inicia fase di perforacion



ORANJESTAD – Sin tanta victoria ainda, pero hopi positivo, minister di Energia sr. Mike de Meza a duna informacion ayera riba ultimo desaroyo di e compania petrolero Repsol su exploracion riba nos plataforma maritimo.

Minister de Meza a declara na prensa cu na luna di november venidero, e decision mester wordo tuma si ta bay sigui cu e fase di perforacion di prueba. E mandatario a bisa cu e fase aki ta hopi costoso ya cu un perforacion asina ta alrededor di 100 miyon dollar.

Fase di perforacion

Si e decision cay, e ta tuma normalmente alrededor di un aña prome cu nan lo sigui cu e ehecucion di e fase di perforacion di prueba, ya cu nan mester bin cu cantidad di ekipo di afo. Pues e ta un operacion sumamente grandi na momento cu Repsol dicidi di bay over di inicia e fase di perforacion di prueba. “Nos ta papia di un perforacion, pero tambe por tin posibilidad cu por tin mas perforacion, el a bisa.

E mandatario a laga sa cu na luna di october -un luna prome cu e fase, programa pa perforacion di prueba- Repsol mester informa gobierno di Aruba si nan lo kier haci uzo di e derecho di perforacion. Pero tambe nan lo por pidi ya sea pa cualkier rason, un plaso of posponemento di

seis luna riba e decision final di cuminsa perfora.

Tur e operacion ta tuma lugá parti panort di Aruba. Tin studio sismológico cu a wordo haci na un distancia di 10 kilometer for di costa di Aruba, y den un superficie hopi grandi. Den e área aki, Repsol a observa diferente puntonan hopi interesante y nan ta analisando esaki. “E ta difícil pa bay den hopi mas detaye, pasobra ainda nan ta pasando den fase di mapa y interpretacion, pero e ta mustra sumamente interesante y bon”, minister de Meza a bisa.

Estudionan y interpretacion

Despues cu na 2012 gobierno di Aruba via Compania Arubano di Petróleo (CAP) a firma cu acuerdo di exploracion cu Repsol, nan a realiza diferente estudio riba tera, lama y nan a studia datonan cu tabata existi den pasado. Na luna di augustus ultimo nan a realiza un exploracion sismografico cu sistemanan masha sofisticada y actualmente e resultadonan di e estudio aki ta pasando den diferente fase. Tur esaki ta un proceso cu e mandatario a describi como “sumamente delicado” cu ayudo di tecnologia nobo y computer basta avansa. Ya e proceso aki a caba y nan a procesa tur dato, y aworaki nan ta finalizando cu e documentacion of pone esey riba mapa di tres dimension. E parti di interpretacion a cuminsa caba, el a laga sa.

Tur esaki ta yuda na momento cu un decision positivo ta wordo tuma pa bay pa e siguiente fase cu ta perforacion. Pero prome cu esey na luna di mei a bin un barco cu a tuma muestra den un penetracion di 5 pa 6 meter for bou tera. Un cantidad di muestra a wordo tuma y cu nan ta analisando actualmente cu ta yuda nan pa ubica e miho area den caso cu e decision a cay pa bay haci perforacion di prueba.

Shell ta den Minister de Mesa a bisa cu den e hazaña aki na Aruba, dos compania mas a join Repsol. Nan ta Total di Francia y British Gas di Inglatera cu recientemente a wordo adkiri pa e compania Shell di Hulanda. Pues Shell ta bay tuma over e actividad aki, pues den futuro si tur cos ta resulta positivo, Aruba lo

mira e tres companianan aki trahando hunto.

E mandatario a participa cu ya caba el a ricibi un carta di e compania Shell su General Manager den nos region, caminda nan ta notifica cu nan ta ocupa cu e proyectonan di British Gas. Nan lo kier bin personalmente Aruba pa introduci nan mes oficialmente cerca nos gobernantenan. Segun minister de Meza, Shell ta masha interesa den e proyecto cu ta tumando lugá na Aruba.

El a bisa cu Repsol tabatin actividad cerca di nos isla, na Colombia, pero mas cerca den e region Venezolano conoci como Perla (Cardon) relativamente cerca di Aruba, caminda nan a haya un di e reservanan di gas mas grandi den historia di Caribe na aña 2009. □